

ՄԻՋԱԶԳԱՅԻՆ ՀԱՐԱԲԵՐՈՒԹՅՈՒՆՆԵՐ

ԹՈՒՐ-ԹԱԹԱՐԱԿԱՆ (ԱՂԻԲԵՋԱՆԱԿԱՆ) ՀԱԿԱՅԱՅԿԱԿԱՆ ՇԱՐԺՈՒՄՆԵՐԸ ԿԱՐՍԻ ՄԱՐԶՈՒՄ 1919 Թ. ԵՎ 1920 Թ. ՄԿՁԲԻՆ

ԷՂԻԿ ՉՈՐՈՒԹՅԱՆ

Կովկասում բրիտանական զորքերի հրամանատար գեներալ Թոմսոնի հրամանով գեներալ Ջոզեֆյանցի հայկական զորամասը անգլիական մի ջոկատի ուղեկցությամբ 1919 թ. ապրիլի 23-ին մտավ Կարսի մարզ և մոտեցավ Կարս քաղաքին, որի հայ և թաթար ազգաբնակչությունը նրանց աղ ու հացով դիմավորեց¹: Հանուն արդարության պետք է նշել, որ Կարս քաղաքի թաթար ազգաբնակչությունը հետագայում ևս դրսեվորեց չեզոք վերաբերմունք Ռուսական վարչության նկատմամբ՝ ընդհուպ մինչև թուրք-հայկական պատերազմը: Գուցե պատճառը Կարսում հայկական բերդապահ զորքի առկայությունն էր կամ էլ հայ ազգաբնակչության թվական գերազանցությունը (թուրքական արշավանքի հետևանքով 1918 թ. գաղթածները 1919 թ. վերադարձել էին): Ինչևէ, մեզ հետաքրքրող ժամանակաշրջանում ո՛չ Կարս քաղաքում, ո՛չ էլ մարզի արևելյան շրջաններում, որոնցում հայկական բնակչությունը զգալի տոկոս էր կազմում, քուրդ-թաթարական ըմբոստություններ համարյա թե չէղան, ինչ չենք ասի Կարսից հյուսիս, արևմուտք և հարավ գտնվող գավառների մասին: Ըստ որում, եթե հյուսիսային շրջաններում (Աղբաբա, Չարուշադ և այլն) բնակվող թաթարներին ոտքի էին հանում Ադրբեջանից եկած գործակալները, ապա հարավում և արևմուտքում (Սարիղամիշ, Կաղզվան, Մերդենեկ) բնակվող քրդերին՝ օսմանյան թուրքերը: Հենց այս՝ քուրդ-թաթարական շարժումներին ու նրանց դեմ ուղղված պայքարին էլ նվիրված է սույն հոդվածը:

Հազիվ 10-15 օր էր անցել հայկական զորքերի Կարսի մարզում հայտնվելուց, հազիվ էին նրանք հաստատվել 1914 թ. ռուս-թուրքական սահմանի այս կողմում, երբ մարզի ամենատարբեր շրջաններից լուրեր են ստացվում հայկական գյուղերի, անգամ զորքերի վրա քուրդ ավազակախմբերի կողմից կատարվող հարձակումների, թալանի, սպանությունների մասին: Այսպես, մայիսի 9-ին Կողբում տեղակայված զորամասի պետը ենթասպա Դոդոխյանին մի քանի զինվորներով ուղարկում է ստուգելու Կողբ-Նարնաուտ ճանապարհի դրությունը, սակայն վերադարձի ճանապարհին Դոդոխյանի խումբը Ալիխանլուի քրդերի կողմից ենթարկվում է զնդակոծության: Ուշագրավ փաստ է արձանագրված երևանյան զորքերի խմբավորման օպերատիվ ամփոփագրում, որ Դրոն

¹ Տե՛ս **Է. Չոհրաբյան**, Թուրք-թաթարական (ադրբեջանական) հակահայկական գործունեությունը 1919 թ. առաջին ամիսներին և Կովկասի բրիտանական հրամանատարությունը, «Բանբեր Երևանի համալսարանի», № 135.1, 2011, էջ 33-47:

եր կազմել: Պարզվում է, որ այդ գնդակոծության վայրում մնացել էր մի վիրավոր հայ, որին Կաղզվանից Կողբ անցնելիս վերացրել էր մի անգլիացի սպա²: Ամփոփագրից չի երևում, թե այդ վիրավոր հայը զինվոր է եղել, թե՞ պատահական ճամփորդ: Բայց ինչ էլ որ լիներ, Դոդոխյանը պետք է պատասխանատվության ենթարկվեր վիրավոր հային դաշտում թողնելու համար: Ինչ վերաբերում է Ալիխանլու քրդական գյուղին պատժելուն, ապա մայիսի 11-ի առավոտյան երկու հայկական վաշտեր մտնում են գյուղ, ձերբակալում 7 քրդերի, բռնակալում գենք, զինամթերք և այլն³:

Թուրք հրահանգիչների կողմից Մերդենեկից հարավ Քյալպինկար, Մեխկերեկ գյուղերում քրդական բանդաների կազմավորման և Ազունդար գյուղից արևմուտք նրանց կենտրոնացման մասին է խոսվում գեն. Սիլիկովին ուղարկած գեն. Յովսեփյանցի մայիսի 15-ի հեռագրում: Տեղեկացնելով, որ այդ բանդաների ստեղծման նպատակը Դերբինսկի շրջանի վրա հարձակումն է, գեն. Յովսեփյանցը միաժամանակ հայտնում է, որ թեև նման հարձակումը համարում է անհնարին, բայց ևայնպես նկատի առնելով Մերդենեկի ջոկատի սակավաթվությունը՝ Սարիղամիշից երկու վաշտ (90 զինվոր) է ուղարկել Մերդենեկ⁴: Սակայն շուտով Սարիղամիշի համար է վտանգ ստեղծվում: Երկրորդ բրիգադի շտաբի պետ կապիտան Գրոսսը հեռագրում է զորքերի հրամանատարին, որ Սարիղամիշի ուղղությամբ Էյուբ փաշայի գլխավորած ավազակային բանդան, որի կազմում մինչև 1500 մարդ կա, սկսել է գործել ակտիվորեն, ուստի ինքը որոշել է հունիսի 12-ին Մերդենեկի ջոկատի մի մասը ուղարկել Սարիղամիշին օգնության և հույս ունի ջախջախել Էյուբ փաշայի բանդան⁵:

Արխիվային փաստաթղթերի ուսումնասիրությունը ցույց է տալիս, որ քրդական բանդաները արդեն հունիսին գործում էին խիստ համագործակցված, կապ էին պահպանում միմյանց հետ, տեղեկություն հաղորդում հայկական զորքերի տեղաշարժերի մասին և այլն: Այդ մասին է վկայում թեկուզ այն փաստը, որ Մերդենեկից Սարիղամիշին օգնություն ուղարկելու արդեն հաջորդ օրը՝ հունիսի 13-ին՝ 200 հոգուց բաղկացած մի ջոկատ հարձակում ձեռնարկեց Մերդենեկի ուղղությամբ՝ Կայլի Օգրդարա գյուղի վրա, իսկ 15-ին 300 հոգով հարձակվեցին Մուզարատ գյուղի ուղղությամբ⁶: Ճիշտ է, այդ հարձակումները ետ մղվեցին Մերդենեկից ուղարկված զորամասի ուժերով, բայց փաստն ինքը խոսում է, եթե ոչ քրդական շարժումը մի կենտրոնից ղեկավարվելու, ապա զոնե նրանց միջև կապի առկայության և տեղեկատվություն հաղորդելու մասին:

Գեն. Յախվերդովի 1919 թ. հունիսի 18-ին կազմած օպերատիվ ամփոփագրում ասված է, որ Կոնդ, Սամալեկ, Դորթքիլիսա գյուղերի շրջանում նկատվում է քրդերի կուտակում՝ մոտ 1000 մարդով: Ի դեպ է ասել, որ նախորդ օրը՝ 17-ին, կազմած ամփոփագրում զորքերի հրամանատարին կից շտաբի պետ գեն. Յախվերդովը ավելի ընդարձակ ամփո-

² Տե՛ս ՅԱԱ, ֆ. 199, ց. 1, գ. 50, թ. 18:

³ Տե՛ս նույն տեղը:

⁴ Տե՛ս նույն տեղը, թ. 15:

⁵ Տե՛ս նույն տեղը, թ. 43:

⁶ Տե՛ս նույն տեղը, թ. 48-49:

փագիր էր կազմել, որում անդրադարձել էր Կաղզվանի, Սարիղամիշի և Մերդենեկի շրջանների դրության հարցին՝ արձանագրելով, որ «Քրդերը շարունակում են հարձակվել հայկական բնակչության վրա: Հունիսի 6-ին քրդերը հարձակվել են Պասլի գյուղից ոչ հեռու՝ Կաղզվանի կիրճում Կարս վերադարձող 5 միլիցիանտների վրա և բոլորին սպանել են: Թուրք սպաները և ասկյարները շարունակում են ագիտացիա մղել մուսուլմանների շրջանում, որ Հայկական կառավարությունը ուզում է ոչնչացնել բոլոր քրդերին, դրա համար էլ լեռներում ապաստանած շատ գյուղեր, որոնք դեռ չեն ազատվել թուրքական կողմնորոշումից, հաճույքով չեն ընդունում Հայկական կառավարության իշխանությունը: Քրդերի առանձին բանդաներ թաքնվում են Գեչեվան, Գյումուշխանա, Օլուխլու, Բաստում, Օրթաչայ, Չենգլի, Խար, Շաբան, Կետե, Ղարաբաղ գյուղերում»⁷: Այնուհետև շեշտելով, որ քրդերի հետ վարվող բանակցությունները դեռևս ոչ մի դրական արդյունք չեն տվել, գեն. Հախվերդովն ավելացնում է, որ հունիսի 10-ին Թուրքաշեն գյուղի մոտ բռնված թուրք ասկյարը ասել է, որ թուրք սպաները հավաքագրում են տեղացի մուսուլմաններին հայերի դեմ թշնամական գործողությունների նպատակով: «Զարոգչությունը Թուրքիայի և Անդրկովկասի շրջաններում ուժեղանում է, - ասված է բանակի գլխավոր շտաբի հունիսի 17-ի գաղտնի գեկուցագրում: - Այդ նպատակով մեծ քանակությամբ թուրք գործակալներ են ուղարկված Հայաստանի ներսերը, մահմեդական գյուղերը և ամեն տեղ հայտնաբերվում են մեր վարչության և հակահետախուզության կողմից: **Մասնավորապես գորավոր է թուրք գործակալների ազդեցությունը Արդահան-Օլթիի և Բարդուսի շրջաններում, ուր նրանք կազմակերպել են գնդացիներով զինված քրդական հրոսակախմբեր: Նույն պատրաստությունը կատարվում է և՛ Սարիղամիշ - Կաղզվան տարածության վրա, և՛ ավելի հեռուները՝ Բարթոռյան լեռնաշղթայի քրդաբնակ մասերում մինչև Արարատ»⁸ (ընդգծումը մերն է - Է. Չ.):**

Հասկանալի է, որ Հայաստանի կառավարությունը այս ամենի մասին պետք է հայտներ դաշնակիցներին և հայտնում էր: Բայց վերջիններս ոչ միայն միջոցներ չէին ձեռնարկում, այլև հանգստացնում էին հայերին, թե թուրքերը ի վիճակի չեն լուրջ վտանգ ստեղծելու: Ահա օրինակ, ինչ է ասված Ալ. Խատիսյանին ուղարկած գեն. Կորիի հունիսի 19-ի նամակում. «Ես անհապաղ կգեկուցեմ Բարձր հրամանատարությանը Ձեր հարդորումները թուրքական գործակալների վերսկսված գործունեության մասին: **Սակայն ես կուզեի հիշեցնել Ձեզ, որ երբեմնի թուրքական մեծ ազգը այժմ հիմնավորապես ջախջախված է, որ նա չունի ո՛չ բանակ, ո՛չ ռազմամթերք, ո՛չ որևէ ուժ, և ինչպես չաշխատեն նրա գործակալները, նրանք վճռականապես ոչնչի չեն հասնի... »⁹ (ընդգծումը մերն է - Է. Չ.):**

Դժվար է ասել, թե սա բրիտանական հրամանատարության համոզվածությունն էր, թե ասված էր հայերին հանգստացնելու համար: Բայցևայնպես մի բան անհերքելի է, դա այն է, որ Անդրկովկասի բրի-

⁷ Նույն տեղում, թ. 48:

⁸ Ս. Վրացյան, Հայաստանի Հանրապետությունը, Եր., 1993, էջ 314:

⁹ ՀԱԱ, ֆ. 276, ց. 1, գ. 120, թ. 134:

տանական հրամանատարությունը շարունակեց մնալ դիտողի դերում, իսկ թուրք-ադրբեջանական հակահայկական քարոզչությունը օր օրի ծավալվում էր ու սպառնալից տեսք ստանում: Եվ արդեն հուլիսին այն պայթեց համախուլամական շարժման ձևով՝ սկիզբ առնելով Շարուր-Նախիջևանում և այնուհետև ներառելով Մերդենեկ-Կարակուրտի, Սարիղամիշի, Կաղզվանի և հարակից շրջանների մուսուլմաններին՝ քրդերին: Շարուր-Նախիջևանում ծագած ապստամբության մասին մանրամասն ներկայացված է դեռևս 2002 թ. լույս տեսած մեր գրքում¹⁰, իսկ այժմ անդրադառնանք մեր գրքում տեղ չգտած որոշ փաստերի, որոնք տեղի են ունեցել հուլիսի առաջին օրերին:

Հուլիսի 7-ին գեն. Փիրումովը հաղորդում է, որ հուլիսի 6-ին Սարիղամիշից Կարակուրտ ուղարկված երկու վաշտերը Սարիղամիշից 15 վերստ հեռավորության վրա հարձակման են ենթարկվել 200 քրդերի կողմից, որ Կարակուրտի մոտ մարտը շարունակվում է, և որ նույն 6-ին քրդերը մտել են Մեչետլի գյուղը և թալանել¹¹: Համաձայն գործերի ընդհանուր հրամանատարի գլխավոր շտաբի պետի պաշտոնակատար գնդ. Չինկեիզի կազմած ամփոփագրի՝ ամսի 8-ին քրդերը նորից հարձակվել են Մեչետլի գյուղի վրա, բայց տալով 50 զոհ՝ հետ են փախել և 9-ին ուղարկել սուրհանդակներ՝ խնդրելով վերջ տալ կռիվներին և խոստանալով անհապաղ ուղարկել ամեն մի գյուղից երկուական վստահելի քրդերի՝ բանակցելու համար: Ինչ վերաբերում է քրդերի հետ տարված բանակցություններին, ապա Կարսի նահանգապետ Ղորղանյանը (Կորգանով) ներքին գործերի մինիստրին ուղարկած հուլիսի 12-ի հեռագրում տեղեկացնում է, որ «քրդերը ուղարկել են ներկայացուցիչներ: Մենք ներկայացրել ենք հետևյալ պահանջները. գերիների վերադարձ, զինաթափում, հրահրողների հանձնում, վնասների հատուցում, որի համար տրվել է մեկ օր ժամանակ»¹²: Բայց, ինչպես երևում է, քրդերը չեն կատարել այս պայմանները կամ էլ դիտավորյալ ձգձգել են, ինչի մասին է վկայում բանակի հրամանատարին ուղարկած գեն. Փիրումյանի հուլիսի 27 հեռագիրը, որտեղ խոսվում է գեն. Հովսեփյանցի նույնանման պահանջների մասին քուրդ ղեկավարներին¹³:

Հուլիսյան այդ օրերին աշխուժություն է դրսևորում նաև իրեն քրդերի առաջնորդ համարող Էյուբ փաշան: Հուլիսի 21-ին բանակի հրամանատարի շտաբի կազմած ամփոփագրում ասված է, որ Էյուբ փաշայի բանդան հուլիսի 19-ից 20-ի գիշերը հարձակում է գործել Վերիշեն գյուղի վրա, որտեղ շարունակվում են կռիվները¹⁴: Իսկ հուլիսի 15-ի ամփոփագրում, որը դարձյալ կազմել է գնդ. Չինկեիզը, ասված է, որ ըստ լուրերի՝ Էյուբ փաշան թուրք սպաների մասնակցությամբ որոշել է թույլ չտալ հայերի մուտքը Օլթիի շրջան, որ նա Բարդուսի շրջանում զորահավաք է հայտարարել, որ նա ունի երկու լեռնային թևանոթ և այլն¹⁵:

¹⁰ Տե՛ս Է. Ա. **Չոհրաբյան**, Նախիջևանյան հիմնահարցը և Հայաստանի «դաշնակիցները», 1918 թ. դեկտեմբեր- 1920 թ. ապրիլ, Եր., 2002:

¹¹ Տե՛ս ՀԱԱ, ֆ. 199, ց. 1, գ. 50, թ. 83:

¹² Նույն տեղում, թ. 91:

¹³ Տե՛ս նույն տեղը, թ. 114:

¹⁴ Տե՛ս նույն տեղը, թ. 107:

¹⁵ Տե՛ս նույն տեղը, թ. 95:

Հաջողության հասնելով Շարուր-Նախիջևանում հուլիսի երկրորդ կեսին՝ մահմեդականությունը օգոստոսին ընդհանուր գրոհ ձեռնարկեց Հայաստանի դեմ՝ փորձելով այն օղակել երեք կողմերից: Օգոստոսի առաջին օրերին համառ կռիվներ ծավալվեցին Բեյուր-Վեդիում, Սուրմալուում, Կաղզվանում, Սարիղամիշում և ամբողջ արևմտյան ճակատի երկարությամբ: Օգոստոսի 6-ին թուրք-թաթարական հրոսակախմբերը հարձակվում են Իգդիրի շրջանի Արագ-Գյոլ գյուղի վրա, որի բնակիչները ստիպված հեռանում են Մուլա-Ղամար գյուղը: Իսկ քրդերը հարձակվում են Սարիղամիշի ուղղությամբ, բայց շրջակա իշխող բարձունքներում ամրացած մեր զինվորներին հաջողվում է հետ շարտել գրոհողներին¹⁶: Օգոստոսի 10-ին քրդերը հարձակվում են Նաև Ասլանլու գյուղի վրա, բայց հաջողություն չեն ունենում: Այդ նույն օրը քրդերը հարձակվում են Նաև Աբաս-Գյոլ գյուղի վրա (Իգդիրի շրջան), որտեղ մարտերը տևում են մի քանի օր, և ի վերջո քրդերին հաջողվում է գրավել Աբաս-Գյոլի շրջանը¹⁷: Օգոստոսի 7-ից փոփոխակի հաջողություններով կռիվներ են ծավալվում Նաև Կողբի և Դաշբուրունի շրջաններում:

Այսպիսին էր իրադրությունը ռազմաճակատներում օգոստոսի կեսերին: Ստեղծվել էր խիստ ծանր, օրհասական վիճակ: Թշնամին փաստորեն օղակել էր հանրապետությունը երեք կողմերից: Եվ այսպիսի պայմաններում Փարիզից պաշտոնական լուր ստացվեց, որ օգոստոսի 15-ին բրիտանական զորքերը հեռանում են Անդրկովկասից: Օգոստոսի 8-ին Փարիզի վեհաժողովի Նախագահ Կլեմանտյոյին ուղարկած հեռագրում, բողոքելով բրիտանական զորքերի հեռացման մասին Վեհաժողովի որոշման դեմ, վարչապետ Խատիսյանը գրում է. «Թուրք-թաթարական շարժումը արդեն սկսում է սպառնալ հայ ժողովրդի գոյությանը: Բրիտանական ուժերի ներկայությունը մասամբ զսպում է այդ շարժումը: Նրանց հեռացումով անխուսափելի աղետ կսկսվի: ...Մարդկային արդարության և Հայաստանի գոյության անունից պահանջում եմ շտապ և եռանդուն միջոցներ ձեռք առնել աղետից խուսափելու համար»¹⁸:

Թե որքանով էր Եվրոպան մարդկային արդարության ջատագով, Խատիսյանին վաղուց հայտնի էր: Բայց այս անգամ նա առիթ ունեցավ համոզվելու, որ Հայաստանի գոյությունը ևս Եվրոպային շատ քիչ է հետաքրքրում: Անցնում են օրերը, իսկ Վեհաժողովից որևէ պատասխան չկա: Իրական օգնությունը զորք ուղարկելը կլիներ, բայց, ինչպես տեսանք, այդ նույն Վեհաժողովի որոշումով էին բրիտանական զորքերը հեռանում Անդրկովկասից: Չնայած դրան՝ օգոստոսի 15-ին գումարված Հայաստանի խորհրդարանի արտակարգ նիստը որոշեց մեկ անգամ ևս դիմել Փարիզի Վեհաժողովին և դաշնակից տերությունների խորհրդարաններին: Ժամանակակիցները այդ նիստը նմանեցրել են սգահանդեսի: Ծանր ու ճնշող էր այն տպավորությունը, որ ստեղծվել էր վարչապետին փոխարինած Ս. Սահակյանի զեկուցման հետևանքով: Ներկայացվել

¹⁶ Տե՛ս «Աշխատանք», 14 օգոստոսի 1919 թ.:

¹⁷ Տե՛ս «Հայաստանի աշխատավոր», 14 օգոստոսի 1919 թ.:

¹⁸ ՀԱԱ, ֆ. 200, ց. 1, գ. 201, թ. 72:

Էին այնպիսի փաստեր, ռազմաճակատներում տիրող դրությունը նկարագրվել էր այնպիսի գույներով, որ ամենքին հուսահատություն էր պատել: «Մենք հետզհետե շրջապատվում ենք երկաթե օղակով: Թշնամին ուզում է ներխուժել մեր երկիրը, - ասված է գեկուցման մեջ: - Կառավարությունը բավարար չգտնելով ներկա զինվորական ուժը, կոչ է անում ժողովրդին զոհաբերել իր գույքն ու կյանքը»¹⁹: Այնուհետև նշելով, որ Օսմանյան Թուրքիան ամիսներ շարունակ իր գործակալների միջոցով տեղական մահմեդականներին հայկական կառավարության դեմ գրգռելուց հետո այսօր նա, իր սպաներով և ասկյարներով քրդական ու թաթարական հրոսակախմբերի գլուխն անցած, հիմնահատակ է անում գյուղերն ու ավանները, Շարուրի, Նախիջևանի, Սուրմալուի, Երևանի և Կարսի գավառներում կոտորում է հայ ժողովրդի մնացորդները, ուստի հայ ժողովուրդն «այսօր կանգնած է իր դարավոր դահճի դիմաց մեն-մենակ՝ առանց դաշնակից զորքերի, առանց բավարար քանակությամբ զինամթերքի ու ռազմական ուժերի», հետևաբար նրան «**այլ բան չի մնում, քան քաղաքակիրթ մարդկության խղճին և մտքին հասցնել իր օրհասի գույժը և պատվավոր մահվան վճռականությամբ ընդառաջել իր ծանր ճակատագրին**»²⁰ (ընդգծումը մերն է - Է. Չ.):

Վեհաժողովը զորք ուղարկել էր կարող և չուղարկեց էլ, ոչ էլ փոխեց իր որոշումը Անդրկովկասից բրիտանական զորքերը դուրս բերելու վերաբերյալ: Դրա փոխարեն որոշեց Հայաստան ուղարկել ամերիկյան գնդապետ Ուիլյամ Հասկելին՝ որպես Հայաստանի կոմիսար: Հասկելը Երևան հասավ օգոստոսի 21-ին, 22-ին ելույթ ունեցավ խորհրդարանում՝ խոստանալով հարկադրել Ադրբեջանին վերջ տալու հակահայկական գործուղություններին: Նրա ելույթը մեծ խանդավառություն առաջացրեց խորհրդարանում, քանի որ նա խոստացել էր կազմակերպել Հայաստանի պարենավորումը, օգնել գենքի և զինամթերքի հարցում և այլն: 23-ին Հասկելը մեկնեց Թիֆլիս՝ այնտեղից Բաքու անցնելու և Ադրբեջանի կառավարության հետ բանակցելու համար: Բայց շուտով պարզվեց, որ նա Բաքվում բանակցել է ոչ թե Շարուր-Նախիջևանը Հայաստանին վերադարձնելու, այլ ամերիկյան գեներալ-նահանգապետություն ստեղծելու շուրջ, որն այդպես էլ չիրագործվեց: Ինչպես նաև չդարձրեցին ոչ ադրբեջանական և ոչ էլ թուրք գործակալների հակահայկական խժժությունները:

Դեռ օգոստոսի 18-ին քրդերը մթության քողի տակ գրավում են իշխող բարձրունքները Կաղզվանի շուրջը և կրակ բացում Կաղզվանի ջուկատի վրա, և միայն լույսը բացվելուց հետո հրետանու օգնությամբ հաջողվում է քշել քրդերին²¹: Օգոստոսի 25-ին քրդական մի հրոսակախումբ հարձակում է գործում Սարիղամիշի ուղղությամբ՝ Մելիգյուզ գյուղի վրա²², իսկ 29-ին քուրդ ղեկավարները վերջնագիր են ներկայացնում Կաղզվանի շրջանը 16 ժամվա ընթացքում մաքրելու մասին²³: Ըստ

¹⁹ Ս. Վրացյան, նշվ. աշխ., էջ 318:

²⁰ ՀԱԱ, ֆ. 198, ց. 1, գ. 34, թ. 2-3:

²¹ Տե՛ս նույն տեղը, ֆ. 199, ց. 1, գ. 50, թ. 123:

²² Տե՛ս նույն տեղը, թ. 138:

²³ Տե՛ս նույն տեղը, թ. 141:

երևույթին դրանք հենց այն քուրդ ղեկավարներն էին, որոնք հավաքվել էին Սարիբուլախի շրջանի Ախչայ գյուղում և որոշում կայացրել իրենց ուժերով դուրս քշել հայերին Կաղզվանից և Խորասանից՝ ստեղծելով այնտեղ սեփական կառավարություն: Քրդերի այդ որոշման մասին Կարսի նահանգապետին հայտնել էր անգլիացի կապիտան Պրեստորը, որը Սուրմալու մեկնելու ճանապարհին եղել էր Կաղզվանում, իսկ նահանգապետն էլ իր հերթին «գաղտնի» շիֆրով հեռագրել էր Ներքին գործերի մինիստրին: Յետաքրքիր է, որ նահանգապետի այն հարցին, թե կարո՞ղ ենք դիմագրավել Ախչայ-Սարիբուլախի քրդերին, անգլիացի սպան դրական պատասխան էր տվել՝ պայմանով, որ եթե Կաղզվանում կենտրոնացվի ոչ պակաս 8 հրետանի և համապատասխան թվով զինվորներ²⁴:

Ահա թե որքան էին լկտիացել քրդերը: Դրան ի պատասխան՝ Սարիղամիշի հայկական զորամասի հրամանատարությունը հանձնարարություն ստացավ Սարիղամիշ-Կարս ճանապարհի վերջնական ապահովման նպատակով հարձակում սկսել Կարակուրտի և Դևիկի ուղղությամբ: Հարձակումը սկսվեց օգոստոսի 29-ին: Այդ մասին բանակի հրամանատարի շտաբ ներկայացված սեպտեմբերի 1-ի ամփոփագրում ասված է. «Կարակուրտի ջոկատը հարձակումը սկսեց ժամը 7-ին և արդեն 11-ին գրավեց Կարակուրտը: Քուրդ հրոսակախմբերը, որոնք ղեկավարվում էին թուրք սպաների և ասկյարների կողմից, երկուժամյա համառ դիմադրությունից և մեծ կորուստներ տալուց հետո փախան Բաշկյոյ գյուղը: Մերոնք հետապնդեցին հակառակորդին, որը ժամը 16-ի մոտ վերջնականապես ջախջախվեց և թողեց Բաշկյոյի դիրքերը: Դևիկի ջոկատը հարձակումը սկսեց ժամը 11-ին: Հակառակորդի առաջապահ մասերը դուրս քշվեցին մեր կողմից և ժամը 15-ի մոտ մերոնք գրավեցին Էմիրխան և Ներքին Սալուտ գյուղերի միջև լեռնաշղթայի գիծը: Հակառակորդը խուճապահար փախավ: Մեր զորքերը ներկայումս զբաղեցնում են Վերսման գյուղի վերին դիրքերը»²⁵:

Սեպտեմբեր-դեկտեմբերին Կարսի մարզում քրդական շարժումը որոշ չափով թուլանում է: Սեպտեմբերի համար ռազմական ամփոփագրում նշված է միայն մի դեպք. սեպտեմբերի 18-ին զինվորական հետախուզությունը Կաղզվանից արևելք Խըղնասար, Ջագիկ և Կիզիլքիլիսա գյուղերում հայտնաբերում է քրդական հրոսակախմբեր և կարճատև հրաձգությունից հետո գրավում այդ գյուղերը, իսկ քրդերին քշում լեռները²⁶: Հոկտեմբերի համար ևս մի դեպք է նշված. հոկտեմբերի 11-ին փոխգնդապետ Շաղուբատովի գլխավորությամբ մի ջոկատ է ուղարկվում Տոդան գյուղը, որտեղ գտնվում էր քուրդ առաջնորդ Ալի-Ռզայի շտաբը: Համառ կռիվներից հետո ջոկատին հաջողվում է գրավել գյուղը և հրդեհել: Քրդերը փախչում են Չուխուր-Չան լեռան ուղղությամբ: Ջոկատի ձեռքն են ընկնում փաստաթղթեր, թուրքական ժանդարմների ուսադիրներ և մեկ թուրք ասկյար²⁷: Նոյեմբերի 7-ին Բալըխ-

²⁴ Տե՛ս նույն տեղը, ֆ. 201, ց. 1, գ.2, թ. 16:

²⁵ Նույն տեղում, թ. 144:

²⁶ Տե՛ս նույն տեղը, թ. 151:

²⁷ Տե՛ս նույն տեղը, թ. 173:

լը գյուղի ուղղությամբ (Սարիղամիշի շրջան) ուղարկված հետախուզական խումբը գնդակոծվում է քրդերի կողմից, որից հետո Բաշկյոյի տեղամասի պետը կազմակերպում է հարձակում և քրդերին քշում դեպի Կազան, Օրտա-Կալա և Չերմալի գյուղերը²⁸: Վերջապես, դեկտեմբերի 22-ի համար կազմած ամփոփագրում ասված է, որ Կազըկայա գյուղից քրդերը հարձակում են գործել Արմատլը-Բաշկյոյի ուղղությամբ (Կարակուրտի շրջան), բայց մեծ կորուստներ տալուց հետո նահանջել են²⁹:

Յետաքրքրական է, որ հոկտեմբերին կազմված երկու փաստաթղթում խոսվում է նաև Օլթիի գավառի գրավման համար հայկական զորքերի կենտրոնացման մասին: Բանն այն է, որ ըստ ապրիլի 14-ին գեև. Թոմսոնի կազմած և Յայաստանի ու Վրաստանի կառավարություններին ներկայացրած ժամանակավոր սահմանագծի (մինչև Փարիզի կոնֆերանսի վերջնական որոշումը)³⁰ Կարսի մարզից միմիայն Կարսի և Կաղզվանի գավառներն էին տրվում Յայաստանին, իսկ Օլթիի գավառը և Արդահանի օկրուգի Քուռ գետի աջափնյա հատվածը դրվում էր Բաթումի նահանգապետի տիրապետության տակ (Քուռ գետի ձախփնյա հատվածը և ներառյալ Արդահան քաղաքը տրվում էին Վրաստանին)³⁰: Բայց ինչպես երևում է, Բաթումի անգլիացի նահանգապետը դժվարացել է հիմնականում քրդերով բնակեցված Օլթիի հարցում և համաձայնել, որ այդ գավառի կառավարումը հանձնվի Յայաստանին: Յայկական զորքերի հրամանատարին ուղարկած 2-րդ բրիգադի շտաբի պետ կապիտան Գրոսսի 1919 թ. հունիսի 12-ի հեռագրում ասված է, որ «Օլթիի օկրուգի վերաբերյալ անգլիական հրամանատարության և մեր վարչության անորոշ դիրեկտիվների պատճառով մինչև այժմ չեմ կարող ակտիվ գործել Օլթիի ուղղությամբ: Բոլոր երեք շոկատներում մեկական անգլիացի սպա կա: Ես ձեռնպահ եմ մնում ակտիվ գործողություններից, քանի որ թուրք պրովակատորները լուրեր են տարածում, որ իբր հայերը մորթում են մուսուլմաններին և դրանով դժվարեցնում են մեր տարածքների գրավումը»³¹:

Այսպես էր Օլթիի հարցը հունիսին: Բայց, ինչպես երևում է, հոկտեմբերին դրությունը փոխվել էր: Այդ է վկայում գեև. Փիրումովի (Փիրումյան) Երևան՝ բանակի հրամանատարին ուղարկած հոկտեմբերի 20-ի հեռագիրը, որտեղ խոսվում է այն մասին, որ «Օլթիի գրավման համար գեև. Յոսեփյանցի գլխավորած զորամասը այսօր կենտրոնացել է Մերդենեկում»³²: Ճիշտ է, իսկույն ևեթ շեշտում է, որ չարամիտ մարդիկ արդեն հասցրել են Օլթիում տարածել լուրեր, որ հայկական զորքերը գալիս են մուսուլմաններին բնաջնջելու, և որ բնակչության մեջ աշխատանքներ տանելու նպատակով գործուղում են մեծապատիվ մուսուլմաններ, և որ զորքերը առաջ կանցնեն միմիայն գործուղվածների վերադարձից հետո: Յեռագրում Փիրումովը խոսում է նաև Էյուբ փաշային Կարս հրավիրելու, նրա հետ Օլթին գրավելու շուրջ բանակցելու

²⁸ Տե՛ս նույն տեղը, թ. 189:

²⁹ Տե՛ս նույն տեղը, թ. 47:

³⁰ Տե՛ս «Բանքեր Յայաստանի արխիվների», 1993, № 1-2, էջ 90-91:

³¹ ՀԱԱ, ֆ. 199, ց. 1, գ. 50, թ. 43:

³² Նույն տեղում, թ. 177:

և խնդրում կառավարությանը թույլ տալ իրեն Էյուբ փաշայի կողմից իր պայմաններն ընդունելու դեպքում նրան գնդապետի աստիճան շնորհել: Սակայն հայակական կողմի այս ցանկությունները չիրականացան. հոկտեմբերի 27-ին գեև. Յախվերդյանի կազմած ամփոփագրում ասված է. «Բանակցությունների նպատակով Օլթի ուղարկած պատվիրակությունը ձերբակալված է Օլթիի կոմիտեի կողմից»³³:

Դատելով արխիվային փաստաթղթերից՝ քրդական շարժումը 1920 թ. զգալիորեն նվազել է: Համենայնդեպս մինչև Հայկական զորքերի կողմից Օլթիի գրավումը (1920 թ. հունիսի 18) արխիվներում 3-4 փաստաթուղթ է պահպանվել քրդական շարժումների մասին: Դրանցից առաջինը գլխավոր շտաբի հետախուզական բաժնի պետ կապիտան Մուրադխանյանի 1920 թ. հունվարի 22-ի գաղտնի զեկուցումն է, որտեղ ասված է, որ «մեզ թշնամի քրդական հրոսակախմբերի կազմակերպիչ Սելիմը 1000 հեծյալներով (մտավ) Խորոշնկա և պահանջեց քրդա-թաթարներից իր տրամադրության տակ դնել բոլոր հեծյալներին, բացի այդ պահանջեց ռուսներից միանալ իրեն, բայց վերջիններս հրաժարվեցին»³⁴: Այնուհետև շեշտելով, որ այստեղ տենդորեն նախապատրաստություն է գնում, և նորից դրսևորվում է հակահայկական շարժումը, Մուրադխանյանը անդրադառնում է նաև Չարուշադի շրջանի և Օլթիի քրդերին: Պարզվում է, որ Չարուշադում քրդերի միջև համերաշխություն չկա և երկու մասի բաժանված՝ պայքարում են միմյանց դեմ, իսկ Օլթիում Հայաստանի կողմակից Իզո-բեկի դիրքերը թուլացել են, քանի որ համաձայնություն չի կայացել օկրուգի ազգաբնակչության և Իզո-բեկի միջև վարչության ու ժանդարմերիայի ծախսերը հոգալու հարցում:

Հաջորդ գաղտնի զեկուցագիրը կազմվել է փետրվարի 7-ին³⁵: Այնտեղ խոսվում է այն մասին, որ Բերդիկ և Կալանջիկ գյուղերի քրդերը Ռասաբեկի գլխավորությամբ որոշել էին հնազանդության առաջարկով դիմել Հայաստանի կառավարությանը, բայց դրան խանգարեց մեր հակառակորդ Սելիմը: Նաև հայտնվում է, որ, ըստ լուրերի, Էյուբ փաշան ստացած վերքերից մահացել է Էրզրումում:

Ավելի ընդարձակ զեկուցագիր է ուղարկել Ալեքսանդրապոլ գեև. Փիրումովը ապրիլի 7-ին տեղի ունեցած քրդական հարձակումների մասին՝ Սարիղամիշի և Օլթիի ուղղություններով³⁶: Գեներալը հայտնում է, որ ապրիլի 7-ին քրդերը հարձակում են գործել Սարիղամիշի ուղղությամբ՝ Սաաթ-Վերան գյուղի վրա: Կամավորական վաշտը հետ է շարտել հարձակվողներին, բայց հետո փամփուռների բացակայության պատճառով հարկադրված է եղել հետ քաշվել դեպի Կյանտան: Նաև տեղեկացնում է, որ Կարակուրտի շրջանից Կաղզվան ուղարկված միլիցիոներներին Տասան բեկի քրդերը թույլ չեն տվել անցնել: Ինչ վերաբերում է Օլթիի ուղղությանը, ապա նույն օրը՝ ապրիլի 7-ին, քրդերը և թուրքերը մոտ 300 հոգով հարձակման են անցել՝ Կեմարից հարավ-արևմուտք գտնվող 1133

³³ Նույն տեղում, թ. 180:

³⁴ Նույն տեղում, ֆ. 200, ց. 1, գ. 441, թ. 31:

³⁵ Տե՛ս նույն տեղը, թ. 32:

³⁶ Տե՛ս նույն տեղը, թ. 133:

բարձունքը գրավելու նպատակով, բայց Կեմարի պահակախմբի կողմից ետ են շարտվել: Կորովենկայից հարձակվող քրդերին օգնության են եկել մոտ 100 քրդեր, որոնք փորձել են գրավել Դադուշենից արևմուտք գտնվող բարձունքը, բայց սմանապես ստիպված են եղել հետ նահանջելու:

Գաղտնի ամփոփագիր է կազմված Կարսի մարզի վերաբերյալ մայիսի 23-ին, որում խոսվում է նաև Օլթիում տիրող դրության մասին³⁷: Նշված է, որ թուրքական կանոնավոր զորքեր Օլթիում չկան, այլ կան հայդուկներ և պահեստային ասկյարներ, և որ Օլթիի օկրուգում զորահավաքը տվել է 1200 մարդ՝ չհաշված Թուրքիայից եկած ասկյարներին և հայդուկներին, որոնց ընդհանուր թիվը 500 է և որոնք հիմնականում կենտրոնացած են Կոստրում, Փենյակում, Մոշեղում և Ադուդիրում: Իսկ Օլթիի օկրուգի սահմանները պահպանում են 500-600 հայդուկներ, որոնք ունեն ռուսական արտադրության 2 լեռնային թնդանոթ, 7 գնդացի (4-ը «Լուխս» տիպի և 3-ը՝ «Մաքսիմ»):

Ինչպես արդեն նշել ենք, հայկական զորքերի կողմից Օլթիի գրավումը տեղի ունեցավ հունիսի 18-ին: Այդ օրը հայկական կանոնավոր զորքերի հետ մեկտեղ Օլթի մտավ նաև կամավորական սկզբունքով կազմավորված զորամասը (մոտ 1000 հոգի) և սկսեց տեղի ազգաբնակչության նկատմամբ թալանն ու բռնությունները, որի մասին պերճախոս վկայություն կա ներքին գործերի մինիստրին ներկայացրած Կարսի նահանգապետի զեկուցագրում³⁸: Կարդալով այս զեկուցագիրը՝ հասկանում ես, թե որքան հակասական էին հարաբերությունները նահանգապետի և Կարսի մարզում գործող զորքերի հրամանատարության միջև: Չկար կապ, չկար փոխհամաձայնություն, նահանգապետը մեկուսացված էր գործերից: Մի ուշագրավ փաստաթուղթ է պահպանվել արխիվում՝ թվագրված հուլիսի 5-ով, որտեղ ասվում է. «Ներքգործ և զինմին Ռուբեն Տեր-Մինասյանի կարգադրությամբ հայտնում եմ, որ գեներալ Փիրումովի համաձայնությամբ կարող եք ետ կանչել ադմինիստրացիան Կոստորից՝ ևս նկատելով այդ շրջանը զինվորական թատերաբեմ»³⁹:

Թե ինչու քաղաքացիական վարչության դուրսբերումը Օլթիից պետք է կատարվի Կարսի բերդապահ զորքերի հրամանատար գեներալ Փիրումովի համաձայնությամբ, դա Ռուբեն Տեր-Մինասյանի գաղտնիքն է: Բայց որ այդ գաղտնիքը պետք է առաջ բերեր նահանգապետ Կորգանովի (Ղորղանյան) դժգոհությունը, դա արդեն գաղտնիք չէր, քանի որ Կոստորի քաղաքացիական վարչությունը իր վերահսկողության տակ էր գործում: Փոխադարձ անվստահության փաստ է նաև այն, որ երբ Օլթին գրավելուց երկու շաբաթ անց 2-րդ բրիգադի հրամանատարը առաջարկում է Օլթիի հույներին գաղթեցնել դեպի Կարս՝ որպես պատանդ, և նաև պաշտոնանկ անել գավառապետ Իզոբելին, ապա նահանգապետը մերժում է երկու պահանջներն էլ ու խորհուրդ տալիս վերջ տալ թալանին ու բռնություններին և դրանով իսկ վերացնել կասկածները ինչ-որ դավերի մասին⁴⁰:

³⁷ Տե՛ս նույն տեղը, թ. 122:

³⁸ Տե՛ս նույն տեղը, ֆ. 201, ց. 2, գ. 636, թ. 18-22:

³⁹ Նույն տեղում, ց. 1, գ. 48, թ. 166:

⁴⁰ Տե՛ս նույն տեղը, ց. 2, գ. 636, թ. 26:

Նահանգապետ Ղորղանյանը դավադրություն է տեսնում նաև Կարսի մարզի Աղբաբայի շրջանը Կարսի մարզից անջատելու և Ալեքսանդրապոլի նահանգին միացնելու մեջ: Նա գրում է. «Երկաթուղու գիծը, ճիշտ է, մաքրվեց թրջությունից⁴¹, բայց թուրքերն անցան լեռները զինված, կողոպտված և վրեժխնդիր: Թալանն այդ օրերում առասպելական էր, պաշտոնական դիմակի տակ մարդիկ գալիս էին կեղեքելու և հարստանալու և ինձ պետք չէ ասել, որ այդ առանցքում խախտվում էին պետական հիմունքները և իրավակարգը արմատորեն կազմալուծվում էր: Բայց շատ բնորոշ է, որ ալան-թալանի առանցքում, ուր տանող-տանողի էր, Ալեքսանդրապոլի վակգալում ինչ-որ քաղաքագլուխների ու գորավարների մասնակցությամբ վճռվում է Կարսի նահանգի Աղբաբա գավառամասը կցել Ալեքսանդրապոլի գավառին: **Այդ մեծ ու երկրի համար նշանավոր խնդիրը լուծելիս Ալեքսանդրապոլի վակգալի հեղինակավոր խորհրդակցությունը հարկավ չհամարեց Կարսի նահանգապետի կարծիքը այդ առթիվ հարցնելու: Սա արվեց իբր Աղբաբայի թրջությունը թուլացնելու նպատակով:** Աղբաբան առանձնացավ և Ալեքսանդրապոլի իշխանությունը նույնքան տեղյակ է Աղբաբայի անցուդարձից, որքան ես Մարսի կյանքից: Եվ այդպես, որ կողմից էլ մոտենալու լինենք Աղբաբան Կարսի **Նահանգից անջատելու խնդրին, մի բան անվիճելի կմնա, Աղբաբան առանձնացավ իսպառ, վարչական կապը նրա հետ դարձավ ավելի փոքր, քան նորմալ**»⁴² (ընդգծումը մերն է - Է. Չ.):

Ինչ խոսք, որ իրավացի կլիներ նահանգապետը, եթե նա անտեղյակ լիներ Աղբաբան անջատելու տրամադրության անկայությանը կառավարությունում: Բայց բանն էլ հենց այն է, որ ներքին գործերի մինիստրի տեղակալ Մանասյանը նախապես տեղյակ էր պահել ու նաև հարցրել նրա կարծիքը: «Մանասյանը սույն հարցի մասին խոսել է նաև Կորգանովի հետ, - ասված է կառավարություն ուղարկած ներքին գործերի մինիստրի զեկուցագրում, - վերջինս դեմ է, սակայն ուրիշ պատճառաբանություն չի բերում, բացի այն, որ 40 տարի այդպես է եղել, այսինքն այդ եռանկյունին (Աղբաբայի Կարսի մարզից անջատվող մասը - Է. Չ.) Կարսի նահանգի մեջ է համարվել»⁴³: Իսկ ներքին գործերի մինիստրը հետևյալ բացատրությունն է տվել կատարվածի մասին. «1920 թ. մարտի 3-ին իմ օգնական Մանասյանը Ալեքսանդրապոլում խորհրդակցություն է ունեցել գեներալ Փիրումովի, նրա շտաբի պետի, Ալեքսանդրապոլի և Կարսի քաղաքագլուխների ու գավառական կոմիսարի հետ այն միջոցների մասին, որոնք անհրաժեշտ են այդ գավառում խաղաղությունը մշտապես պահպանելու համար:

Խորհրդակցությունը անհրաժեշտ է գտել, որ Կարսի նահանգի մի մասը, որ մոտ է Ալեքսանդրապոլին, կցվի Ալեքսանդրապոլի գավառին հետևյալ սահմանով. սկսած այն կետից ուր միանում են Արփաչայն ու Կարսչայը, Կարսչայով բարձրացած մինչև Շահնալար ու այնտեղից Կարախանչայով բարձրացած մինչև Ախալքալաքի սահմանը. Մանա-

⁴¹ Խոսքը Ալեքսանդրապոլ-Կարս երկաթգծի մասին է:

⁴² ՀԱԱ, ֆ. 201, ց. 2, գ. 636, թ. 16:

⁴³ Նույն տեղում, ց. 1, գ. 48, թ. 64:

վանդ որ զինվորական տեսակետից այդ եռանկյունին ենթակա է Ալեքսանդրապոլի հրամանատարին: Անկախ մյուս պատճառներից, դա անհրաժեշտ է այս անցողակի շրջանի համար, որպեսզի զինվորական և ադմինիստրատիվ իշխանությունները կարողանան խորհրդակցել և համերաշխությամբ վարել գործը: Դա անհրաժեշտ է նաև Ալեքսանդրապոլի ինքնապաշտպանության համար»⁴⁴: Վերջում խնդրում է կառավարությանը տալ իր որոշումը այդ հարցի առթիվ շուտափույթ կարգադրություն անելու համար:

Ինչպես տեսնում ենք, Ալեքսանդրապոլի խորհրդակցությունը բավականաչափ հիմնավոր պատճառներ ուներ, եթե նշվածներին ավելացնենք նաև Ադբաբայի թրքությանը Կարսի թրքությունից անջատելը՝ նման որոշում ընդունելու համար: Այնպես որ նահանգապետի դժգոհությունը անտեղի և անիմաստ է: Եվ թե որքան շահագրգռված էր կառավարությունը Ադբաբայի շրջանի այդ եռանկյունի մասը Կարսի նահանգից կտրելու և Ալեքսանդրապոլի գավառին միացնելու հարցում, վկայում է թեկուզ այն փաստը, որ ներքին գործերի մինիստրի գեկուցագիրը ստանալուց 3 օր հետո՝ մարտի 6-ին, իսկույն նիստ է գումարում և հաստատում այն: Այդ մասին ասված է Ալեքսանդրապոլի գավառնկումին և պատճենը գեև. Խաչատրյանին ուղարկած ն. գ. մինիստրի մարտի 11-ի հեռագրում⁴⁵:

Ինչ խոսք, Ադբաբայի, Չարուշադի, Չալդրի հիմնականում թաթարներով բնակեցված շրջանները, որոնք լավ զինված էին և ենթակա թուրքական, ադրբեջանական և մասամբ նաև վրացական գործակալների ագիտացիային, մեծ վտանգ էին ներկայացնում Յայաստանի համար: Դեռ 1919 թ. հոկտեմբերի 4-ին հետախուզական բաժանմունքի ժամանակավոր պաշտոնակատար կապ. Մուրադյանը գեկուցել է, որ «ըստ լուրերի Ադբաբայի, Մուրազյալի և Չարուշադի շրջաններում թաթարները շարունակում են կազմակերպվել և հանգամանորեն պաշտպանվել հայերի հանկարծակի հարձակումից: Թուրքիայի, Ադրբեջանի և Վրաստանի Եմիսարների կողմից թաթարական զանգվածը գրգռվում է Յայաստանի կառավարության դեմ: Ադբաբայի թաթարների մեջ ազդեցություն վայելող Յալբալա Մամեդ օղլին (Իբիզի գյուղի բնակիչ) կողմնակից է հայերի հետ խաղաղ գոյակցության և թաթարներին խորհուրդ է տալիս չենթարկվել տարբեր Եմիսարների ազդեցության: Գավառական կոմիսարի հետ անձնական տեսակցության ժամանակ նա հավատացնում էր, որ թաթարները չեն մտածում ապստամբության մասին, իսկ զինված են ինքնապաշտպանության նպատակով: Թաթարների վերաբերմունքը տեղական հայերի նկատմամբ բավարար է, իսկ վերաբերմունքը փախստականների նկատմամբ՝ թշնամական»⁴⁶:

Մենք դիտավորյալ ամբողջությամբ մեջբերեցինք կապ. Մուրադյանի խոսքը, որ ընթերցողն էլ համոզվի, թե որքան ոյուրահավատ էին հայերը. թաթարները «զինվում են ինքնապաշտպանության նպատա-

⁴⁴ Նույն տեղում:

⁴⁵ Տե՛ս նույն տեղը, թ. 54:

⁴⁶ Նույն տեղում, ֆ. 199, ց. 1, գ. 50, թ. 164:

կով»: Մուրադյանը ոչինչ չի ասում, մենք էլ ոչինչ չենք իմանում, թե գավառի կոմիսարը հարցրե՞լ է Յալբալա Մամեդ օղլուն, թե այդ ումի՞ց պետք է ինքնապաշտպանվեն՝ դավադիր հայերի՞ց, թե՞ մեկ ուրիշից: Մինչդեռ գեն. Փիրումովը նոյեմբերի 30-ին Կարսից հեռագրում է բանակի հրամանատարին. «ըստ լուրերի Աղբաբայի թաթարների առաջնորդ Քերբալայ Մամեդը, որը երկու ամիս առաջ եղել է Ադրբեջանում, ներկա պահին մեծ թիկնազորով այցելում է Աղբաբայի, Չալդըրի և Չարուշադի շրջանները, կազմում է գեներ կրելու ընդունակների ցուցակներ, նախապատրաստում է ժանդարմներին և տեղական գնդերը: **Ցուցակագրվածները կրում են կիսալուսնով ուսադիրներ**»⁴⁷ (ընդգծումը մերն է - Է. Չ.):

Ահա թե որքան հակասական են նույն մարդու մասին կապ. Մուրադյանի և գեն. Փիրումովի հաղորդումները: Գեներալը նոյեմբերի 26-ին էլ էր հաղորդել Ադրբեջանից Աղբաբա, Չալդըր և Չարուշադ էմիսարների ժամանման մասին, նրանց սադրիչ ագիտացիայի մասին քրդերի, թաթարների և մալականների մեջ՝ ընդդեմ հայկական կառավարության և այլն: Հետագայում ևս գեներալ Փիրումովը բազմիցս հաղորդում է վերը նշված շրջաններում թաթարական շարժումների մասին, բայց հոդվածը չձանրաբեռնելու նպատակով չենք ուզում այդ բոլոր հաղորդումները մատնանշել: Թերևս հիշատակենք միայն մեկը՝ փետրվարի 10-ի (1920 թ.) հեռագիրը, ներքին գործերի մինիստր Գյուլխանդանյանին, որում ասված է, որ «Կարսից գեներալ Փիրումովը հաղորդում է, որ Ինժիդարա, Շայնալար և Կարախաչ թաթարական գյուղերը մեծ ուժերով հարձակվել են հարևան գյուղերի վրա, ըստ որում վերջիններիս դրությունը հուսահատական է: Փիրումովը խնդրում է արտակարգ օգնություն: Կազմակերպել է հազար մարդուց բաղկացած հետևակ և հեծյալ կամավորականների ջոկատ»⁴⁸: Հեռագրի վերջում ասված է, որ գեներալը խնդրում է միջնորդել ռազմական մինիստրի առաջ շտապ Ալեքսանդրապոլ ուղարկել 200000 մոսին տիպի փամփուշտ և մեկ միլիոն ռուբլի՝ ջոկատի կարիքների համար:

Ինչևէ, Աղբաբայի շրջանը Ալեքսանդրապոլի նահանգին հանձնելու մասին Հայաստանի կառավարության մարտի 6-ի որոշումից հետո փաստորեն դադարում են Կարսից հաղորդումները Աղբաբայի դրության մասին, առավել ևս, որ հաջորդ ամսին՝ ապրիլին, բանակցություններ են սկսվում Երևանում պարսկական հյուպատոսի հետ Աղբաբայի շրջանի 16 պարսկահպատակ գյուղերի բնակիչներին (շուրջ 9000 հոգի) Պարսկաստան գաղթեցնելու շուրջ: Ձեռք բերված համաձայնությամբ գաղթողներից 3000-ը պետք է մեկնեին երկաթուղով, իսկ մնացած 6000-ը՝ իրենց ամբողջ ունեցվածքով (սայլեր, անասուններ և այլն) Ալեքսանդրապոլ - Աշտարակ, Էջմիածին - Երևան խճուղով: Հայ զինվորներից բաղկացած պահակախմբերից բացի՝ գաղթողներին պետք է ուղեկցեր նաև պարսկական հյուպատոսարանի ստեղծած 100 հոգիանոց մի զինված ջոկատ: Հայ-պարսկական սահմանի վրա գաղթողները պետք է

⁴⁷ Նույն տեղում, գ. 110, թ. 21:

⁴⁸ Նույն տեղում, ֆ. 101, ց. 1, գ. 48, թ. 16:

հանձնեին իրենց բոլոր զենքերը, արգելված էր նաև ոսկեղեն, գորգեր և ձիեր (թույլատրվել էր միայն 100 ձի) տանելը⁴⁹:

Գաղթողների զինաթափումն ու գույքի ստուգումը կատարվում են օգոստոսին Բաշ-Նորաշենում, որի ժամանակ արտահանության համար արգելված իրերը բռնագրավվում են: Բայց այդ ընթացքում տեղի են ունենում նաև նախնական պայմանավորվածության որոշ խախտումներ: Օրինակ, զինաթափվել էր ոչ միայն գաղթականությունը, այլև պարսկական պահակախումբը, ինչը զենքի փոխադրության մասին կետի անորոշության արդյունք էր (պայմանագրում ասված էր, որ գաղթողներն իրավունք չունեն որևէ տեսակի զենք անցկացնելու սահմանից այն կողմ, մինչդեռ ոչինչ չէր ասված 100 հոգիանոց պարսկական պահակախմբի զենքերի մասին): Բացի դրանից, ժամանակի սղության պատճառով սայլերի մի մասը չէր ստուգվել, այլ գաղթողների համաձայնությամբ յուրաքանչյուր սայլի համար 4-5 հազար ռուբլի գանձելով՝ թույլ էին տվել անցնել սահմանը: Գաղթողներից բանակի համար գնվել էր նաև 130 ձի և այլն⁵⁰:

Սահմանն անցնելուց հետո գաղթականները դիմում են պարսկական իշխանություններին՝ բողոքելով իրենց նկատմամբ հայկական իշխանությունների գործադրած բռնությունների ու հարկադրանքի դեմ՝ իհարկե, ինչ-որ չափով ուռճացնելով կատարվածը: Արդեն սեպտեմբերի 14-ին Երևանի պարսկական հյուպատոսը այդ կապակցությամբ գրավոր բողոք է ներկայացնում Յայաստանի կառավարությանը՝ միաժամանակ ներկայացնելով բռնության ենթարկված քրդերի և պատճառված վնասների բավականին ուռճացրած մի ցուցակ: Իսկ սեպտեմբերի 24-ին Վրաստանում Յայաստանի դիվանագիտական ներկայացուցչին խիստ բողոք է ներկայացնում նաև Կովկասում Իրանի գլխավոր հյուպատոսը և պահանջում, որ Յայաստանի կառավարությունը բարոյական և նյութական գոհացում տա կատարվածի համար⁵¹:

Գոհացում տվե՞լ է Յայաստանի կառավարությունը պարսկական կողմին, ոչինչ հայտնի չէ: Արխիվներում ոչինչ չի պահպանվել:

Այսքանը, ավարտելով մեր խոսքը Կարսի մարզում քուրդ-թաթարական ընդվզումների և հակահայկական գործունեության մասին՝ ուզում ենք կրկին հիշեցնել, որ նախաձեռնելով այս հոդվածը՝ մենք մեր առաջ խնդիր չէինք դրել վեր հանելու ամբողջ կատարվածը, ինչը մի հոդվածի սահմաններում հնարավոր էլ չէ: Մեր նպատակն է ընդհանուր գծերով լուսաբանել այն ամենը, ինչ բնութագրական էր քուրդ-թաթարական շարժմանը մեզ հետաքրքրող ժամանակաշրջանում:

ЭДИК ЗОГРАБЯН – Антиармянские выступления курдов и татар (азербайджанцев) в Карсской области в 1919 – начале 1920 гг. – После того как британское командование передало Армении Карсскую область, в её пограничных с Турцией, а затем и северных районах начались антиармянские выступления кур-

⁴⁹ Տե՛ս Է. Ա. Չոհրաբյան, Սովետական Ռուսաստանը և հայ-իրանական հարաբերությունները, Եր., 1985, էջ 45:

⁵⁰ Տե՛ս նույն տեղը:

⁵¹ Տե՛ս նույն տեղը:

дов и татар, инспирированные эмиссарами Турции и Азербайджана. Для успешной борьбы с ними армяне вынуждены были перебросить свои малочисленные войска, дислоцированные в области, из одного района в другой. В статье подробно показано, насколько несогласованно действовали в этих обстоятельствах армейское командование и руководство Карсской области.

EDIK ZOHRABYAN – *Kurds' and Tatars' Anti-Armenian Activity in Kars Region in 1919 and in the Early 1920s.* – It is illustrated in the article that after the transfer by the British command of the Kars region in Armenia, in areas bordering with Turkey (Sarighamish, Kaghzvan, Merdenenk, etc.) and then in the northern parts of the region (Aghbaba, Zaryshad, Chalder) began Kurdish and Tatar anti-Armenian movements, instigated by emissaries from Turkey and Azerbaijan. It is also illustrated that for successful fight against Kurds and Tatars the command of Armenian troops discarded in the Kars region had to throw their numerically small forces from one region to the other. No less important role is also given to uncoordinated actions of the command of Armenian troops and government of Kars region.